



廬山太平興國宮採訪真君事實卷之三

宋朝崇奉類

聖旨文字

得旨加封

九天採訪應元保運妙化真君徽號御管轄道士熊  
守中前德江州太平興國宮設醮一千二百分位五  
晝夜拜奏寶章并於壽聖廣福觀大中祥符觀各設  
醮一百二十分位降賜下項務在如法排列精加祈  
禱即賜感通仍賜御書並具收領回奏

得旨宣諭安撫制置史尚書今令江州太平興國宮

管轄熊守中齋三清閣御書及香信等於本宮設醮  
并奉安誥命仰尚書代書青詞祝版御名及差屬官  
一員到宮主香所有日分却令熊守中供報仍具已  
差官職位姓名前往回奏嘉熙四年閏十二月日協  
中大夫保康軍承宣使入內內侍省副都知張延慶  
恭準

真君祝版

維淳祐元年歲次辛丑二月己未朔初六日甲子  
皇帝某謹遣太平興國宮管轄道士熊守中謹以清  
酌庶羞之奠敢昭告于

九天採訪應元保運妙化真君品冠仙都道高今古  
綬集生靈福流下土運數脩延實歸宗主揆之百神  
靈休爲愈徽號聿崇斯爲盛舉特伸慶讚摠誠帝所  
用昭告於神聰敬一酬于觸俎尚饗

設醮意旨

嗣天子臣某伏念續紹丕圖期光前烈茂延支本式  
固邦家眷茲福系之隆實藉神功之佑恭惟

九天採訪應元保運妙化真君天之貴神國之主宰  
千萬載垂休於宗社五百年流福於生靈茂著仙遊  
宜崇徽號謹備潔滄之禮用伸慶讚之忱謹取二月

初六日就江州廬山太平興國宮命闔宮員士開建  
祈穀福時齋壇五晝夜節次拜奏寶章閣祝周天星  
燈甲子長生命燈滿散設醮一千二百分位延奉上  
真導迎景既伏奠神休密佑聖造潛扶寧謐三邊安  
全萬宇咸睹清寧之象早開嗣續之祥永錫和平更  
祈豐稔

上帝青詞

淳祐初元屬履王春之吉太平真宇奠蒙帝祉之私  
猥以菲涼紹茲休烈天知悔禍幸邊備之甫紂民慮  
阻飢念邦儲之尚窘每軫憂於丹悃丐垂旒於蒼穹  
爰命羽流肅延騰馭就演藥料之祕載脩藻薦之虔  
伏願和氣薰陶以氛滌盪千祿百福之介燕翼有開  
一食二實之通魚麗允叶

真君青詞

應元保運扶世教之彌長著德立功爲國朝之尊仰  
由聖跡顯揚於廬阜而徽稱荐錫於先朝茲循彝典  
之褒崇式表真風之妙化盍奏聞於上帝庸慶讚於  
神休肅展蘋蘩上延芝馭伏願垂九穹之妙造福降  
簡穰安四海之生靈國祈泰定俾遂狼烽之息蚤膺  
熊夢之祥

壽聖廣福觀大中祥符觀醮意

維淳祐元年歲次辛丑二月己未朔十八日丙子  
嗣天子臣某仰惟

九天採訪應元保運妙化真君道品聿崇福源浸衍  
爲嶽瀆之主宰實國朝之貴神稔著仙猷茂增徽號  
當醮儀報讚之後乃百神交慶之初爰演冲科同歆  
盛事取今月十八日就江州廬山壽聖廣福觀開建  
靈寶道場一晝夜誦經行道關祝星燈滿散脩設清  
醮一百二十分位延奉上真仰祈景貺伏冀神休叶  
贊遂民安國泰之期邊鄙無虞覩天清地寧之象

青詞

褒妙化之徽稱百神交慶對玄穹之上帝一念潛孚  
非惟侈緝典之昭明抑以顯靈休之偉赫用歲潔蠲  
之禮同伸讚慶之私伏願聖造協扶共保丕圖於綿  
永邊陲寧謐俾躋黎庶於昇平儲嗣流祥清寧開泰

本州乞降御香奏狀

臣厲文翁據江州廬山太平興國宮住持知宮兼管  
轄李守浩狀申照得本宮係採訪宅靈之地崇奉皇  
帝本命申福殿歲有春秋國醮係守臣代書御名詞  
表其旨曰俯爲天下生靈禳災祈福祥符元年準勅

歲降濕香下本宮諸殿堂供燒後來本宮不曾援例  
陳請竊惟福庭香火刻聖崇奉褒嘉緝禮降香建醮  
保國寧邦靈驗昭著勅文省劄非一而止昨蒙使府  
以瑞雪愆期持忱設醮隨獲感通十萬戶和氣遍覃  
五百年流福應識自祥符至嘉熙年內遇時降香建  
醮感應嘗奉聖旨加封真君妙化二字及頒降御書  
三清閣宇仍賜度牒沉香腦子鎮壇繒綵等設醮保  
邊所嗣詞意具存但前後降香建醮皆係使府保奏  
今來欲乞照例保奏朝廷舉行舊典所據前狀須至  
奏聞者

右臣照得太平興國宮係開元二十五年置於一州  
九天採訪真君治所自唐開元至本朝已五百餘載  
神應非一褒典屢加國初以來給降御香歲有常比  
迨至隆興因循廢闕嘉熙二年及四年奉旨管轄能  
守中申請遂蒙朝廷加封真君妙化二字及降賜御  
香等自後本宮無人陳乞而本州亦不復與之奏申  
殊失累朝崇奉之意大為闕典近緣去臘瑞雪愆期  
臣躬詣祠下爲民祈禱即獲感應如響斯答三白呈  
瑞豐年有兆即其靈驗所合申述彛章以昭神貺伏  
望聖慈特賜睿旨照國朝舊典每歲給降御香下本

宮并照嘉熙庚子年頒降建醮指揮施行謹錄奏聞  
伏候勅旨

寶祐四年正月日

賜香省劄

昨準禮部符準寶祐四年正月八日都省批下知江  
州屬文翁狀奏乞舉行國朝舊典每歲給降御香下  
江州廬山太平興國宮建醮事後批送禮部契勘體  
例申尚書省準此本部所準都省批下上件事尋連  
送太常寺契勘分明拍定申部去後據太常寺申本  
寺今據照奏內稱乞照嘉熙庚子年頒降建醮指揮

施行今指定欲乞省部備申朝廷下江州行下本宮  
照嘉熙庚子年頒降指揮體例徑自申請施行右  
連元送一宗申部乞備申朝廷施行尋呈奉判備太  
常寺所申符本州徑自照元得指揮申請施行仍申  
省照會今本部具申朝廷照應外符州照應徑自照  
元得指揮申請施行所準前項指揮州司除已遵稟  
備報本宮照應施行去後今據太平興國宮回申開  
具到本宮節次承準朝廷降香建醮等事月日體例  
事件申州乞備申省部檢照前例給降施行太平興  
國三年春秋二醮勅牒太平興國三年春秋二醮省

牒齋料帳三縫紹興三十一年降香設醮祝版隆興  
二年降香設醮祝版端平三年廟堂奏旨設醮祈穀  
禳兵詞旨七縫并可漏嘉熙元年降香設醮保邊祈  
嗣玉簡嘉熙二年降香設醮禳兵詞旨并銀兩會子  
綾羅單子等三縫肆件淳祐元年加封真君徽號詞  
旨祝版降香并祠牒銀兩綾羅聖旨文字肆縫伍件  
右除已將前項文字申部乞辨驗發下本宮照應外  
本州保明是實伏乞指揮給降施行伏候指揮照得  
知江州厲文翁申乞舉行國朝舊典給降御香下江  
州廬山太平興國宮設醮事契勘先朝間曾降香及

賜御書并降度牒綾羅等今據住持知宮事李守浩  
乞檢照元來已得指揮符本州徑自照例申青六月  
九日三省同奉聖旨照舊例降香下江州付本宮設  
醮仍照嘉熙庚子給賜并下御藥院內侍省學士院  
江州本宮各照應右劄付廬山太平興國宮寶祐四  
年六月日

得旨宣諭制置厲侍郎江州太平興國宮八月十五  
日脩設國醮今賜去沉香三十兩篋檀降真各一十  
斤充本宮醮筵供燒使用以後祈禱別有降賜仍具  
收領回奏寶祐四年七月日入內內侍省東頭供奉



官眷恩殿祇候幹辦龍圖天章等閣幹辦內藏庫翰  
林司毛存恭準

奉安御書疏意

臣屬文翁情旨昨於領藩之初因以禱雪而應慨念  
真君儲福之地夙存國朝賜香之彝宮門既有失於  
申明州郡復不爲之啓請亟騰奏牘隨沐恩光恭準  
聖旨宣諭每歲賜太平興國宮沉香三十兩箋擅降  
真各一十斤充八月十五日秋祭醮筵供燒向後別  
行宣賜以用祈天永命保國安邊溥及生靈同躋仁  
壽今則已次琳宮預白丹悃伏望景曜下臨監九重  
之忱悃名熏上賜脩每歲之常儀所集勝因以祈嘉  
既

皇帝陛下恭願鴻圖廣大燕翼綿長庶證時而百穀  
成民皆樂業中國安而四夷服邊不揚塵

初降御香建國醮別奏青詞

採訪宅靈金闕地隆於廬阜祈禳歲祀寶薰歲遣於  
禁庭屬州家之奏請愆期致聖代之彝儀缺廢恭以  
皇帝陛下秉心翼翼行善孜孜露禱深宮恪謹朝昏  
之禮日臨當宇諄勤中外之憂體累朝尊奉之心加  
妙化褒崇一號茲率脩於常典爰寓敬於辦香惟真

旂周覽乎九天之間則明鑒宜乎於午位之上今首  
足患深於蜀廣乃瘡痍痛及於淮襄水旱間關兵財  
匱乏臣身叨間寄世荷君恩望丹陛以輸忠即朱陵  
而請福伏願帝躬壽樂國本安強四序氣調大有稻  
梁之慶三邊勢鞏永無烽燧之虞凡曰王民均蒙道  
廕

恭奉朝廷賜錢設普度醮密劄

恭奉宣諭指揮去歲兵革以來忠亮死節戰歿之士  
甚多流離橫天傷亡之民甚衆孤魂無依實可興念  
當行普度使遂起生四川可於重慶兩廣當就南嶽

荆湖江西仍就江州太平興國宮三處各修醮一千  
二百分每一處降賜沉香一百兩腦子十兩降真三  
百斤黃蠟一百斤官會十萬貫專差人兵管押前去  
逐一交割嚴緊排辦擇八月內啓建三晝夜已劄四  
川制置司廣東經畧安撫司廣西經畧安撫司湖南  
安撫司京湖制置司

景定元年六月日

昨者韃虜不道荐食無厭所賴人可即戎每戰必克  
或執干戈以衛或奪螫孤以登未嘗臨敵以懷生皆  
欲滅此而後食竭忠思報視死如歸殺氣干霄而欲

腥英魂委露而逾壯第念形軀之已殞痛于心膂以  
難安謹於八月二十五日就江州太平興國宮脩設  
普度大醮一千二百分用憑道力俾遂超生

青詞

百戰間關見危致命一忠激烈雖死猶生惟勇士不  
忘喪元故敵人每爲奪氣近念胡氛之甚惡遂令國  
步之多艱不貳爾心豈與共戴天而處勉出乃力蓋  
將寘亡地而存義重而形軀則輕役同而瞬息即異  
興言鉅痛深愴至懷帶劔之辭尚新忍忘楚野復矢  
之哀曷挽空慨邾婁虔脩薦拔之科庸寫盡傷之極  
伏望大垂慈鑒俯挈冥途壯節難磨已可垂名於穹  
壤英魂未逝尚能效役於風霆

史大資申述靈驗乞加封尊冊事

本州太平興國宮崇奉

九天採訪應元保運妙化真君香火考諸圖誌實唐  
開元間明皇感夢真靈欲就廬山建祠後五百年福  
及生靈於是勅江州建九天使者廟本朝列聖尤極  
欽崇太宗改賜觀額神宗進號應元保運真君徽宗  
奉上玉冊易觀爲宮高孝兩朝皆常遣官致禱保邊  
禳兵皇上踐祚以來賜奎畫降御香尊奉尤謹若之

自去秋祇戍適值胡馬透渡被旨進黃援鄂岩之聞  
命即行但副閩事權素輕江州又號內地進當大敵  
則無將無兵退守中流則城卑壕淺舟師援鄂則風  
逆莫前增戍保黃則星流告變人心皇皇士氣不振  
事關宗社未知倣濟遂望真祠許設普天大醮三千  
六百分保國禳兵由是天乃返風遣援無虞靈貺昭  
昭敢忘報謝岩之遂躬詣本宮酬還醮願遍讀碑刻  
始知真靈一號朱陵上帝採訪九天九地較定天人  
祿壽生靈禍福其尊與天帝比又至九宮九州九星  
分野陽九百六之數實與世運關係興衰而本朝蒙  
福爲多建炎逆賊張遇攻犯江州城中軍民親見真  
相現於雲端結成龍馬賊遂殞滅開禧吳曦叛蜀夔  
帥蔣介有神降莘謂採訪已奏於上帝行被族誅今  
茲狂虜犯順實賴陰相江面再清東南奠枕逆數今  
日至于開元辛未正應五百年後靈響昭彰如此但  
岩之竊念神考進應元保運之號係降詔旨及徵廟  
追繼先志錄之玉冊以至列聖青詞皆以皇帝臣某  
寇之嘉熙年間加封妙化二字太常一時失於檢會  
止今命詞給誥與元豐政和典禮舛異恐未稱明時  
昭事之意謹錄元豐政和詔冊繳連在前欲望公朝

特加敷奏付有司討論典故於應元保運妙化今號  
之上加上八字徽號尊以冊書鏤以嘉玉收回元誥  
赴禮部架閣不惟消弭兵災肇開泰運保國祚於有  
永延聖壽以無疆抑與列聖尊崇典禮不至背馳豈  
勝宗社生靈之幸

景定元年五月日

陸殿撰再奏乞頒降封冊事

臣景思照得本州太平興國宮

九天採訪應元保運妙化真君考之圖誌自唐開元  
見夢著靈有五百年後福及生靈之證參之碑刻一

號朱陵上帝採訪九天九地主九宮九州星野陽九  
百六之數按之祀典本朝自太宗賜今觀額神宗降  
詔進號應元保運真君徽宗奉上玉冊易觀爲宮高  
孝兩朝皆嘗遣官致禱邊事皇帝臨御以來加封妙  
化二字頒降三清閣御書降香設醮朱表青詞所以  
欽奉者至隆質之靈驗建炎張遇犯城有現雲滅賊  
之應開禧吳曦叛蜀有降筆誅兇之報今年虜哨入  
本州瑞昌縣境若有所制訖不能前陰護一方全活  
甚衆致如甘雨時雪消疫濟荒保邊攘兵護國救民  
其所以孚佑者甚盛臣景思維今泰運方回熙典備

舉方秩無文而咸祀必致崇極於大神矧採訪高真  
流福寰極自開元辛未至于今式應五百年後雖運  
化無名何心隱顯而進號備冊異衆欽崇兩朝詔冊  
以天神禮之列聖表詞以皇帝臣冠之嘉熙加封禮  
寺不及檢會止令行詞給誥未稱舊典御香旣降國  
醮有嚴歲用春秋帥臣奉辭以告崇報未極衆心歎  
焉欲望聖慈降付尚書省於應元保運妙化真君今  
號上加八字徽稱仍乞檢會前知郡資政史岩之所  
申繳錄元豐政和詔冊付有司稽典故尊之冊書鏤  
之嘉王予以稱累朝昭事之心予以迓九天丕錫之

釐須至奏聞者

景定元年九月日

印徽猷申乞加封冊號事

應雷被命假守祭山川之在境內者蒐祠典詢故老  
伏聞

九天採訪真君感夢明皇建祠是邦正直而一敷佑  
下民粵五百年紹興現雲張遇隨滅開禧降筆吳曦  
伏誅虜哨江垸郡嬰孤城以自固一至近境避易驚  
遁此其近事之彰灼也夷考我朝列聖崇褒精忱備  
至神功施及于今名號未加其舊或者其不謂禮前

守臣史資政陸殿撰俱嘗敷奏乞頒徽號以副輿情  
未準回降當今泰運方開地彌天區百神受職靈績  
既昭表章可後欲望公朝檢會詳酌

景定二年五月日

江州備坐省劄

江西安撫知江州今月初五日準迺到行在尚書禮  
部符準景定二年八月初四日都省批下太常寺申  
準都省批下朝散郎新除直徽猷閣知江州印應雷  
申照對昨到郡之初本州士民合詞有請皆曰前歲  
韃虜偷渡路透江西一境獲安皆

九天採訪應元保運妙化真君有祠廬山垂福乞爲  
申明增加徽號又有前政史大資陸殿撰兩嘗奏聞  
謹備元奏重行申述欲望公朝檢會累申特賜敷奏  
六字上加兩字仍檢會政和舊典頒降玉冊申聞事  
奉鈞判送太常寺契勘申本寺照得景定元年六月  
內準都省批下江州申乞與本州太平興國宮崇奉  
九天採訪應元保運妙化真君加上八字徽稱事本  
寺於當月擬封

九天採訪應元保運妙化助順真君尊以玉冊合遵  
照元降指揮今且命詞給誥除已於當年六月內具

申都省外謹具申尚書省伏乞指揮照本寺已申事  
理施行本州證會施行後批送禮部行下本州照應  
施行準此須至符州仰詳省符內遵從備坐批  
狀指揮事理施行所準指揮具呈僉廳官書擬欲帖  
太平宮照會奉台判帖須至行遣

景定二年十一月十八日

加封誥勅

至道之精窈冥無迹超乎萬物之表行乎九天之間  
名位崇而功化妙命之曰真而已江州太平興國宮  
九天採訪應元保運妙化真君冲澹而與造物遊變

化而與陰陽運吉凶悔吝存乎人皆出於寂通感應  
之理天憤不道之虜廼能相王師清江面採訪爲名  
若有物司乎其間不知真君之不物於物而物有不  
能遁之者封極於真君號極於八字尊之至矣可特  
封

九天採訪應元保運妙化助順真君

本州奉安封誥醮慶意旨

歲在己未戎馬寇江密依採訪之靈克相王師之捷  
犬羊掃迹鴻鴈奠居允藉陰功宜崇報典足真封於  
八字惠徼福於九江鳳詔誕頒琳宮改觀臣叨承藩



牧躬致綸恩幸依助順之休爰奉妥虔之禮永扶國祚垂祐邦圻

慶醮詞

有赫厥靈克助王師之順揭虔以告用昭國典之華  
雖真馭母假於褒揚在朝廷合隆於酬報緬惟曩歲  
倏啓厲階江漢浮浮驚渡揚鞬之馬疆場翼翼卒蘇  
涸釜之魚密佐威聲獲全生聚錫徽章於八字蒼景  
既於九天與國同休蕩妖氛於邊壤思皇多祐增瑞  
色於山川

廬山太平興國宮採訪真君事實卷之三

廬山太平興國宮採訪真君事實卷之四

元朝崇奉類

聖旨文字

長生天氣力裏大福廕護助裏皇帝聖旨城子裏村  
子裏達魯花赤官人每根底來往行路底使臣每管  
軍的官人每出軍底人每衆先生每百姓每根底宣  
諭的聖旨成吉思皇帝哈罕皇帝聖旨裏和尚也里  
可溫先生達失蠻不揀甚麼差發休著者告天與俺  
每祝願者道的有來如今依著已先聖旨體例裏和  
尚也里可溫先生達失蠻不揀甚麼差發休著依著

太上老君教法裏告天與俺每祝願者麼道這信州  
龍虎山上清正一宮住持張天師根底執把著行的  
聖旨與了也更有天師本戶演法觀爲頭諸宮觀裏  
房舍裏使臣每休下者不揀是誰休倚氣力住坐者  
宮觀裏休斷公事者倉糧休頓者不揀甚麼休頓放  
者鋪馬祇應休著者商稅休與者但屬宮觀底田地  
水土竹木碾磨船隻園林解典庫店浴室鋪席酒醋  
不揀甚麼差發休要者俺每的明降聖旨無呵推稱  
著諸色投下於先生每根底不揀甚麼休索要者先  
生每也休與者更先生每不揀甚麼公事呵這張天  
師的言語裏太上老君的教法裏休別了依理行踏  
者更俗人每根底休歸斷者先生每與俗人每有折  
證的言語呵倚付來的先生每頭目與管城子官人  
一同理問歸斷者若先生的體例不行行的公事說  
說做賊的先生每於管城子達魯花赤官人每根底  
分付與者更這張天師執把著行的聖旨有麼道無  
體例公事休行者行呵俺每根底說者怎生般道的  
俺每識也者

至元十四年二月初十日

聖節醮意

江州路達魯花赤總管府同本路提點道錄司情音  
伏爲今月二十八日恭遇天壽聖節謹委官虔就福  
地太平興國宮啓建金籙大醮一座預於二十六日  
開啓醮筵轉誦真經宿建齊壇敷露雲篆二十七日  
三時朝奏禮懺陳詞二十八日凌晨修設醮筵上奉  
帝真以伸滿散

皇帝陛下恭願聖壽無疆皇圖鞏固民康物阜海晏  
河清者

青詞

上天眷命篤生神武之姿南極呈祥脩屆誕彌之旦  
敬即琳宮之祕虔依藥笈之科祝睿筭之延洪與天  
無極撫瑤圖於永久如日之升

上元醮意

江州路達魯花赤總管府同本路提點道錄司恭遇  
上元令節天官賜福之辰虔就福地太平興國宮  
九天採訪真君大殿啓建祝聖靈寶清醮一座轉誦  
真經宿啓齋科敷露雲篆三時朝奏禮懺陳詞滿散  
設醮一百二十分位所集殊利上祝  
皇帝陛下恭願聖壽無疆皇圖鞏固民康物阜永消  
疵癘之災時和歲豐欣樂太平之治

青詞

伏以歲序復端肅屆朝元之日聖人在上虔伸祝壽  
之儀殿陛風清香燈露奏迓真存於碧落瞻天表於  
清都享于克誠介以景福

皇帝陛下恭願帝圖天大亨萬國以惟懽聖敬日躋  
命九圍而是式克臻富盛欣樂太平

降香設醮意旨

江州路太平興國宮欽奉朝廷專遣使臣交難與宣  
授玄教宗師總攝兩淮荆襄等路道教江南諸路道  
教都提點張留孫齋擊聖旨捧降御香詣

九天採訪真君大殿焚炷光啓福庭本宮欽此謹消  
本月二十七日脩建謝恩清醮一座所集殊利上祝  
皇帝陛下恭願聖壽無疆皇圖鞏固民康物阜海晏  
河清者

宗師建醮意旨

宣授玄教宗師總攝兩淮荆襄等路道教江南諸路  
道教都提點張留孫同奉御咬雞敬奉皇后懿旨皇  
太子令旨降賜御香下江州廬山太平興國宮採訪  
真君聖殿焚獻專為祝延皇帝聖壽萬安次冀坤  
儲祥震宮集慶萬民樂業四海同風者

延祐五年戊午加封真君徽號

上天眷命皇帝聖旨朕聞天地與之並生妙合胚腠之造山川載其神氣實專監御之司爰考彝章式崇徽號江州路廬山聖治太平宮

九天採訪使應元保運妙化助順真君道超寥廓功贊彌綸總制萬靈通微顯聞幽之故巡遊三界昭福善禍淫之機代穹昊以握符體虛皇而示化肇自唐朝而感夢居然匡阜以宅靈鯨開鼎運護國之祥宜侈渙號揚庭之渥於戲跨九霄際八表運妙用以乘垠歛五福錫庶民保太和而有永可特加號

九天採訪使應元保運妙化助順至德仁聖真君主者施行

延祐五年五月日

廬山太平興國宮採訪真君事實卷之四

廬山太平興國宮採訪真君事實卷之五

習仙類

康先生遇劉越

周有康先生兄弟七人於廬山脩鍊真氣嘉遁林泉  
忽有一少年衣逢掖衣冠章甫冠來訪言論典雅好  
談古今及神仙學先生異之延待益厚如是數歲不  
知姓名來往既久先生云熟子風猷有日矣不敢詰  
姓名復未知棲止少年曰余姓劉名越居在山之左  
先生苟不棄僻陋希垂一訪山下有一石高三尺許  
叩之即得相見先生如其言訪之至山下見一石叩

之忽然自開雙戶洞啓一小鬟迎先生行十餘步復  
有二青衣執絳節前導漸見臺榭參差金碧掩映珍  
禽竒獸花木殊異真人冠王冠朱紱劍佩來迎先生  
知非人間意欲求居真人默知其意謂先生曰子陰  
功未滿後會可期他日蓬海鼇宮赤城絳闕相從不  
晚飲玉酒三爵延年保命湯一啜而出返顧巨石宛  
然如初它日復叩無所應矣即石建亭號曰仙石石

上自有劉仙二字今宮之三門遺址見在

出劉仙石記

張芸叟南遷錄云周有康先生者結廬於北山故  
曰康廬在州之南三十里過甘棠湖循溢江岸高  
下可十里有澗水北流從濂溪書院出又數里至  
新橋左右皆林麓水聲泠然可愛峯頂漸近已越

蛇岡嶺至太平興國觀即唐九天採訪使昔廟熙  
寧中冊制應元保運真君改觀為宮現副宏敏連  
巨溪谷階廡厨福水流周環有元宗手篆殿榜漆  
牌墨字又金銅等身御容兄豐所賜殿榜彩泐金  
字又為髹塗金扉以秘之常不得見又有所賜泥  
金仙衣共三事殿外階下有石一株曰劉仙石康  
先生叩關赴  
劉仙之約云

### 胡冲真遇呂洞賓

本宮道士胡用琮號冲真子幼脫俗緣留心脩鍊熙  
寧中有道人破衫敝履自稱姓回突入庫堂傍若無  
人道士見者不顧而去獨胡公揖坐小軒從容款視  
驚其仙風不凡待遇加禮既而索酒再飲復邀胡公  
出飲于邸胡辭以日暮回掀髯一笑而別翌早胡公

入城謁郡侯抵關未啓鑰道人又自城而出笑以相  
 顧閻吏云未三鼓時有回道人在此候門開不知何  
 人也胡公心亦異之後數年革帶麻鞋挑二壺號大  
 宋客訪胡于道院談論清雅胡問此壺何用荅曰行  
 李也傾壺視之皆黃白之物問胡欲此否胡荅不顧  
 但得長生之術足矣就取碎銀鬻酒與胡飲口授至  
 道及日暮以刀剜土瀝酒漱津和土噓呵成墨擲之  
 几上鏗然有聲語胡曰服此可愈疾入仙矣再飲胡  
 醉倒及星來但聞異香滿室剜土處有泉透出不知  
 客之所在胡以墨研酒飲宿疾頓甦年餘七旬貌若

處子酒量如初由是漸厭人間一旦留詩蛻形而去  
 今宮有墨仙泉掬飲味甘冬夏不竭王左丞宋宋侍  
 郎伯友及諸名公皆有醜唱留題並載本宮胡公亦  
 名賢詩集  
 有遇仙傳出本宮舊  
 記碑刻

齊武直坐化

本宮道士齊武直每旦朝真畢即閉門端坐不交人  
 事誦靈寶度人經真心默契自得其旨崇寧中忽連  
 日飲水不休語同舍道士呂師中曰塵世不足戀吾  
 將逝矣呂以為戲言及夜半趺坐舉手向燭曰茲為  
 證明然此事難哉呂猶未悟乃就枕熟寐既覺齊已



坐亡

出本宮舊記

### 畢養素遇異人

本宮道士畢道寧字康叔幼穎悟貌清奇經書一見成誦紹聖間遊江浙一日到潛山遇方士狀貌甚偉不通姓字相與遊山畢度其非凡欲師事之方士默會其意乃曰學道貴乎鍊神毓氣丹書乃是入道梯媒公若屏絕俗紛精鍊神氣自然通真達靈矣因臨溪水指謂畢曰水定則形直心靜則神寧不可不鑑遂以丹授之曰異日與子再會于聖治峯下一揖而去恍無所睹畢即日還山適遇宮副虛席州命帖充

未幾丐開泰道院于宮之右鑿池瀦水名曰清斯寺日杜門存神誦度人經一卷至宣和乙巳正月三日有衣甲山人來訪話舊授沁園春云一粒金丹大如黍米定中降胎運陰陽根本東龍西虎結凝金水擇地深栽九載無虧三田功滿卦氣周圓爐鼎開偷元化用自然宗祖全在靈臺真才休戀塵埃况穎悟明空嬰未孩幸淮濱相遇靈丹付了親留玄旨期進仙階此去何時水雲高會更上煙霄歧路哉人間世任王侯貴顯同委蒿萊畢得此詞越四日整襟危坐而逝今宮之養素堂右軒扁曰清斯有沼存焉

出本宮舊記碑

王三一主金華洞

本宮道士王秉文字彥衡成道後遊京師其時朝廷  
 方建神霄萬壽宮賜紫衣命充典客忽有方士來訪  
 見几間有周易就布筭數云此地當有兵厄子非數  
 中人宜避之因授與存三守一之要黃帝和扁之訣  
 遂辭職還山至建炎四年本宮燬于賊兵次年盜退  
 莫有任其責者王乃領副職灰燼之餘經營數載金  
 碧繪像煥然一新遂謝官事杜門燕居三十餘年即  
 其居曰三一堂因號三一天生日閱道藏經究竟秘

訣留心醫藥此外無他嗜好至乾道丙戌上元夜夢  
 神人告曰上帝命汝主金華大滌洞賜汝返魂丹一  
 粒復汝精神還汝元氣當以神光白馬諸司官吏迎  
 送入洞言訖覺悟翌旦語諸徒曰塵世不足住吾將  
 往矣因取所著聖治顯驗集十四卷西山真君籤解  
 一部今採訪幾籤即其十全脉訣一部朝斗紫庭秘  
 訣一卷授師孫秦致祥等至二月旦朝香沐更衣發  
 然而逝本州太守唐敷文文若以文祭之曰吾聞真  
 人其寢無夢彼有夢者疑其妄傳以夢為妄又未必  
 然夢齋良禍覺而得賢夢至帝所聞奏鈞天人生如

夢固亦難言於夢之中又有夢焉三一先生天守既  
全臨行夢化默奕真詮帝命賜我金洞還元吾將問  
子孰爲因緣真妄一致瞬息百年超然往矣白馬翻  
翻老圃祁寬贊神云視不見聽不聞中有象酷似君  
強描貌謾辛勤阿睹中欠少分在眉睫常細縷如止  
水如行雲

出本宮  
碑記

### 黃真人尸解

本宮道士黃知微字明道稟性冲淡賦形豐偉元豐  
間充知殿奉香火一日潛山體道先生崔君來訪因  
語泥丸萬神乃圭一粒之妙遂授一丸谷神之道金

液淪景之旨從此若伴若蹶散誕繁常時人呼爲黃

風子遂自賦黃顛歌

載本集

性嗜酒每醉則浩歌歌罷

顛狂常在官前朝真橋上疾聲大呼若有所呵一袖  
百結裸露不顧隆冬盛夏恬無寒暑士夫間有施惠  
者隨手散去或居山間或遊城市常挈兩布囊每遇  
餅餌藥物之屬雜貯囊中了無穢氣號曰錦香時有  
大雪蒼壑變白獨先生所居之屋無雪常指室傍壁  
鏤示人曰此吾遊蜀之路也初不知書所談多史傳  
素不能文而所出皆高妙之句猴溪蔡子高司馬知  
白崔風子高赤脚皆與交遊先生每喜噫氣一噫時

不倚聲崇寧末年餘九十貌若處子肌膚如玉狂態  
如初酒量不減宣和末詔徵不起有司強之至九江  
曰今二天子矣我往何為既而淵聖登極赦至本宮  
未回祿日先生於採訪殿揭甃植蒿歌曰明年了來  
明年了來次年韓世清賊馬果焚宮庭乃植蒿之日  
也談人禍福歷歷皆驗先生羽化瘞于宮側後數年  
有自蜀中回者曰黃風子今在蜀昨於成都相會寄  
家書在此致疑之開械乃是喪亂後所存道士姓名  
於是發棺視之惟衣履在出黃真  
人傳記

劉虛谷坐化

本宮道士劉烈號虛谷子初生時母感異夢長而有  
超卓之志肄業山中交遊不雜王公大人嘆其貌有  
太古淳風必異日之法器也紹興六年朔草庵扁曰  
真一每日端坐檢閱道藏經史一覽隨記士大夫願  
納交焉如晦庵朱文公與談易論還丹之旨詩云細  
讀還丹

一百篇先生信筆亦多言元機謾向經書覓至理端  
於目睫存二馬果能為我馭五芽應自長家園明朝  
酒醒下山去此張于湖孝一見留詩而去福地偏藏  
小洞天

天幽處鍊神仙箇中得趣羅樞密點王參政炎曹兩  
惟虛谷火候參同妙自然

府勛周鳳溪頭岳吏部甫諸名公皆往來談易醜唱

佳什並載本宮  
名賢詩集至隆興元年注解周易正經及六壬

總括機要一部詣京投進蒙宣見問道賜宴應制三

謝恩賜酒乞還山後居山十餘載至乾道九年六月

不食四十餘日惟飲冷水至七月十四日將親書登

真隱訣二十五卷并上經九卷送入本宮藏史四日

中元節親筆留原真一首詩頌等有云虛谷子將欲

遺形棄世掃迹人間趨煙霞廣漠之鄉與道冥一焉

十六夜步月登廬山青牛洞絕頂端坐而化有還丹

百篇雜著詩文周易解義山齋易尚書作序及歷代君臣括

要圖並行于世見江州設廳碑石出虛谷子傳及本宮記

### 劉祖師立化

本宮道士劉大彰字開祖江州湖口八生于元豐癸

亥歲初肄業山中徽廟朝試經為道士禮揚公彝為

師建炎兵變避地鄱陽從歸鄉省親傳聞本宮悉罹

兵燄進退不能遂與徒弟駱守明就湖邑東南隅得

逃亡屋而居之崇奉採訪香火泣而告之故誓願闡

揚道教重立玄功劉為人純謹奉身無長物交遊不

雜鄉曲稱之濟人利物其道甚行遂撒茅居而鼎新

扁曰龍德菴即今西院士民皈嚮香火日隆時劉年已

耄貌若處子一日晨興澡沐更衣誦度人經畢呼其

徒弟來前語以死生超化之道語竟曰理香火起立

而化其貌若生觀者如堵出本宮傳記

### 駱祖師坐亡

本宮道士駱守明字德光即劉大彰之高弟生於政和甲午歲江州彭澤人建炎隨師避地鄱陽同回鄉里聞本宮灰燼與其師就龍德菴居止公之道乃家傳衣鉢日買飛潛跳擲之物而放之始終不輟一日

病革召其徒弟五人來前余懷德揚懷玉李懷智潘懷信劉懷恩取筆

書頌于繼容曰余病時不吉音死余吉音死時不病如

遇呂真人便是我好命真蹟見本宮未幾病愈回宮即黃

真人舊址朔道院扁曰養正取黃之道號今改曰黃仙公享年最

高每日焚香誦經不妄交接一日赴堂展鉢趺坐大

衆舉食公凝然不動視之已坐亡矣果符吉時不病

之語異哉越一日西湖人有夢見公衣紫二青衣執

幡前導識其上曰霍僮山洞天仙官公葬于宮左知

宮胡葆清舉棺云不以擾攘亂其真不以富貴妨其

道雖無留形住世之妙而有脫胎坐亡之功公舊庵

西湖香火興隆異於昔矣出本宮傳記

廬山太平興國宮採訪真君事實卷之五

九

九

Large stylized watermark or seal, possibly containing the characters '西' (West) and '東' (East) in a circular arrangement.

